



Múte B. Egedes nytårstale

Taler

Múte Bourop Egede
Formand for Naalakkersuisut

Dato

1. januar 2023

Sted

Hans Egedes Hus, Nuuk

Omstændigheder

Talen blev TV-transmitteret direkte på KNR (Kalaallit Nunaata Radioa).

Ukiortaami pilluangaaritsi.

Qaamaneq ornikkiartorparput. Nunatta avannaani kaperlak
qaangiukkiartungajalerpoq
qanittumilu nunaqqaterpassuagut seqinniassapput.

Seqinniarneq pingaartinneqarlualunilu persuarsiuutigineqartarpoq,
tupinnanngitsumik.

Qaamanermi annertusiartortoq nukimmik tunisisarpoq, seqinerlu kissalaamik
tunisisarluni.

Ukiup nikinnerani, ukiumi nutaami pisussanut takorluuinerup saniatigut
piffissaasarpoq ukioq
qaangiuttoq kingumut qivialaassallugu.

Ukiup qaangiuttup ingerlanerani assigiinngitsunik aqquusaagaqartarpugut -
Nuannersunik
oqimaatsunillu.

Kingumut qiviarnitsinni ilaqquttat, qanigisat ikinngutit nunaqqatillu
akunnitsinniikkunnaarsimasut
ummaatitsinni ilagaagut eqqaamallugillu.

Inuunerup ingerlanerani ilaqquttat, nalunngisat ikinngutillu akornanni
pisoqarfiungaatsiartarpoq.
Allanngortoqartillugu misigissutsikkut aalassatsinneqartarpugut.

Taamaakkaluartorli ilikkartarparput aamma inuunerup ingerlaqqittarnera,
aqqusaakkat
nuannersuuppata imaluunniit oqimaatsuuppata.

Asasakka nunaqqatikka tamassinnut pinngitsoorusunngilanga ukiumut
pereersumut qujassallunga.

-o-

Ukioq nutaaq aallartippoq.

Ukioq nammineq ilusilersugassarput, qanoq atussanerlugu.

Kiffaanngissuseqarluta aammalu pisussaaffeqarluta inuuvugut.

Nunami kusanangaartumi eqqissisimanangaartumilu najugaqarpugut.

Nunarpulli aamma imaannaanngitsunik atugaqartitsisarpoq.

Tamakkuli anigortuartarpagut immitsinnut ikioqatigiinnitsigt
kivitseqatigiinnitsigullu.

Inuiaqatigiuvugummi susassareqatigiinnermik ilaqutariinnilu
ataatsimoornermik pingaartitsisut.

Taamaattumik neriuppunga ukiumi nutaami ilaqutariittut toqqisisimasumik
meeqqatta inuuneqarnissanut aammalu utoqqartatta ilalersornerunissaannik
ukioq tamatta atorumaaripput.

Meeqqammi inuusuttullu pisariaqartippaat isumassorneqartuarnissartik,
pisariaqarfiinilu
killilerneqartarnissartik.

Killiliinermi ajortuunngilaq kisiannili inersimasunut minnerunngitsumillu
utoqqarnut
ataqqinninnermik, ukiuni kingullerni annikilliartuinnarsimasup
mumiseqqinnissanut tamatta

pitsanngorsaaqataasariaqaratta.

-o-

Tamatta seqinitta ataani inuuvugut.

Tamatta ullorissat taakkuusut ataanni inuuvugut.

Tamatta immap ataatsip avatangersimavaatigut.

Tamattalu silaannaq ataaseq najuussorparput.

-o-

Nunarput ataasiuvoq inuiaallu aamma ataasiusariaqarput.

Ataatsimoortariaqarput.

Ataatsimoorangattami akiugassaajunnaarluta angusaqarsinnaalersarpugut.

Unammilligassavut qaangissallugit nukissaqarnerulersarpugut.

Ullormi aallartikkaangatsigu takulersaraavut asasavut, uatsinnut
nukissaqarnerulersitsisut.

Takulersaraavut aamma nunaqqativut sullittut, tamatta maani nunami
tummisinnaajumalluta
imminut napatittut. Ilaquttatik nunartillu napatikkumallugit qimoqataasut.

Tamavitta immitsinnut nukissaqarnerulersittarpugut, sulilu
nukissaqarnerulerumalluta
ataatsimoortariaqarpugut.

Avissaartuunnissaq aqquutissaanngilaq immitsinnillu tikkuartuunnitsigut
inuiattut
nukillaarsarsinnaasarnerput qanortoq ikioqatigiinnermut, ataatsimoornermut
aaqqissuutissanillu
tikkuussinermut atoritigit.

Taamaaliornikkut anguniakkat angunissaat nukissaqarfiginerulerlugulu angulertornerusinnaanngussagatsigit.

Amerlasuutigummi akunnitsinni aporfiusinnaasut qitiutittarpavut, mumisillugu ikioqatigiiffiginnaasatta aallaaviginerulernissaannik ukiumi nutaami kissaateqarfigaassi.

Ikioqatigiinneq susassareqatigiinnerlu, ullunut aggersunut, unammillernarsinnaallutillu nuannersunut pisariaqartipparput.

-o-

Nunatsinni innuttaasut tamarmik immikkuullarissuseqarput aammalu immikkut tunniussassaqaarlutik.

Ilai nipaatumik inooqataapput.

Ilai nunaqarfinni najugaqarput.

Ilai illoqarfinni najugaqaarlutik.

Tamatta assigiinnegeqaagut assigiinngitsunillu tunniussassaqaarluta. Assigiinngiffippulli eqqarsaatigiunnaarutsigu, assigiiffigaarput inuiaqatigiinni tamatta pisariaqartinneqaarlutalu tunniussassaqaratta.

-o-

Peqqinnissakkut sullinneqarnissaq annertuumik pisariaqartinneqarpoq ulluinnarnilu sumiiffinni amerlasuuni annertuumik sulisussanik amigaateqartoqarpoq.

Nunani tamalaani nunanilu avannarlerni sulisussaaleqinerup aamma atuunnerata kingunerisaanik,

nunatsinni peqqinnissaqarfimmi ataavartumik sulisoqarniarneq annertuumik unammillernartoqalersitsivoq.

Nunatsinni peqqinnissaqarfimmit neqeroorutit pitsanngorsarnissai tamatta soqutigisaraarput.

Innuttaasullu toqqissisimanissaat peqqinnissaallu qulakkeerumallugu suliniartuassaagut.

Nunatsinni peqqinnissaqarfimmi sulisut ulloq unnuarlu suliuarput. Naak suliffimmini atugassarititaasut pitsaanerusinnaagaluartut.

Immikkut peqqinnissaqarfimmi sulisut qujaffigerusuppassi. Qularnanngitsumik sapinngisannguarsi tamaat ilungersorlusi suliuarpusi.

Uagut suliassarput tulleeq tassaavoq, sullissiumalluarnissi inuiaqatigiinnut pitsaanerpaamik sinaakkusiiviginissaa.

Aallartisaleruttorpugullu.

Ukiup qaangiuteqqammersup naalernerani nappaassuarmut kræftimut akiuniarnermut katsorsaanermullu kiisalu avatikkut suliaritinnissaminnik utaqqisunut immikkut ittumik iliuuseqarpugut.

Aammattaaq immikkut annertusisamik seeqqumikkut siffissamikkullu suliaritittussat malunnaatilimmik ikilisinnissaat sulissutigineqassalluni.

Ukiortaarmi aallartittoq peqqinnissaqarfiup siunissami inuiaqatigiinnut pitsaanerusumik sinaakkusigaasumik aaqqissuuteqqinnissaa.

Nunaqarfimmi arlalinni ammalumi illoqarfimmi peqqinnissaqarfiit ullutsinnut tulluarnerusunngornissaat pisariaqarluinnarpoq.

Politikkikkullu suliaqartut akunneranni siammasissumik aaqqiiviginissaanut
sulineq
isumaqatigiinniarnerrillu ingerlanneqassapput.

Tassanilu peqqinnissamut ataatsimiitsitaliarsuup, aasaqqaalernerani
isumaliutissiissutissaa
suliareqqinnermi sakkussat ilagilluarumaaraat qularnanngilaq.

-o-

Nunatsinni inuppassuaqarpoq pikkorissunik, angusarissaartunik, nukittuunik
akisussaaffimmillu
tiguseqataasunik.

Qujanaq kivitseqataagassi.

Nunatsinni aamma inuppassuaqarpoq inuiaqatigiinni malugineqarpiarneq
ajortunik.

Aqqusinniortoq tassaannaanngilaq asfalterisoq. Aqqusinniortoq tassaavoq
nunaqarfimmi
illoqarfimmiluunniit nunap atortulersugaaneranut suleqataasoq.

Sanasoq tassaannaanngilaq sulisartoq, sanasorli tassaavoq nunatta
ineriartorneranut
sanarfeqataasoq.

Allaffimmioq tassaannaanngilaq suliffeqarfimmi pappialarsortoq, allaffimmioq
tassaavoq
suliffeqarfiup ingerlalluarnissaannik pingaaruteqarluinnartoq.

Meeqqerivimmi sulisoq tassaannaanngilaq meeqqanik paarsisoq,
meeqqerivimmili sulisoq
tassaavoq meeqqamut perorsaaqataasoq.

Ilinniartitsisoq tassaannaanngilaq atuartunik atuarnissamut ilinniartitsoq,
ilinniartitsisoq tassaavoq

meeqqap siunissaanut sunngornissaanullu sunneeqataasartoq.

Tamatta pisariaqarluinnarpugut. Tamatta inuiaqatigiinni arlaatigut sunneeqataavugut.

-o-

Nunatta patajaatsumik politikikkut aningaasaqarnikkullu ingerlanissaanik suliaqarpugut.

Partiillu tamarmik aningaasanut inatsit ukioq 2023-moortoq ataatsimoorlutik isumaqatigiissutigalugu atsiornikuuaat – taamaattumillu aqut ingerlavigisassarput nalorninata aqutigissavarput.

Qaqutikkut unikaallalluta iluatsittut taasarpagut, isumaqatigiinngiffiit qitiulersarmata.

Assigiinngitsunik isumaqarneq ajortuunngilaq, isumaqatigiinngikkaannili akkerliiginnaqinani isummat naapisinniarnissaat pingaartuuvoq.

Isummammi assigiinngitsut pikialasinneranni isumaqarpunga anguniagaq pitsaanerpaq qanillisaripput – assigiinngitsunik isumaqarsinnaaneq uanga nukitut isigisarakku.

Oqallittarnigut nalituutut isigaakka.

Eqqortumilli tunngaveqartarnissaq inuiaqatigiinnillu apuussisarnissaq puigussanngilarput. Nunami manna tamat oqartussaaqataanerani ingerlatsiviusoq illersugassarigatsigu.

Politikkeritullu inuiaqatigiinnut maligassiuartariaqarpugut, isumaqatigiinnginneq akkerliinnerlu pippata aamma isummat naapiffissaqarnerat ersersittassallugu.

Tamannalu alloriarfigineqarpoq ataatsimoorussamik aningaasanut

inatsisilioqatigiinnitsigut.

-o-

Politikkikkut aammalu inuiaqatigiinni tamatta isumaqatigiissutigisinnaasarput
tassaavoq
inuusuttuararpassuit, meeqqat atuarfianniik naammassinninnermik kingorna
ingerlariaqqinngitsoortartut sulii annertunerusumik iliuuseqarfiginissaat
sulissutigissallutigu.

Ilinniarnermi tassaamat Naalagaaffinngornissamut matuersaat aammalu
aningaasarsiorfissatsinnut qaffassaaqataasussat ilaat.

Ukioq manna inuusuttut nunaqarfinneersut illoqarfeeqqaneersullu
ataatsimeersuartinneqassapput.

Inuusuttut amerlanerusut ilinniagaqalernissamut suliffeqalernissamullu qanoq
ilillutik
piareernissaannut inuusuttut siunnersuutissaat ataatsimeersuarnermi
sammineqassaaq.

Inuusuttut pisariaqartippagut – taakkuuppummi aamma nutaamik
eqqarsallaqqissut.

Inuusuttut kaammattortuassavagut – taakkuuppummi siunissami nunatsinni
ingerlatsitsisussat.

-o-

Nunatta Danmarkillu akornanni 1945-miit ullumimut pissutsit pillugit
qulaajaasoqarnissaanik
isumaqatigiissummik aasaq danskit ministeriunerallu atsioqatigiinnikuuvugut.

Suliaq taanna pingaaruteqarluinnarpoq.

Nunasiaataasimanerup nalaaninngaanniit ullumikkumut pissutsit pisarsimasut
akuersaarneqarsinnaanngitsut amerlasuut saqqummernikuupput.

Aammalu qaqilerneqarlutillu toqqortorneqarnatik saqqummertariaqarnerat
pisariaqarlunnarpoq.

Arnanut spiralilersuisimaneq.

Meeqqat misileraataasimasut.

Inatsisitigullu ataataqanngitsut.

Pingaaruteqarporlu aamma saammaasseqatigiinnermut ataatsimiititaliap
saqqummiussimasai
innersuussutaallu suliami ingerlanneqqartussami ilanngullugit
sammineqarnissaat.

Innersuussutimmi suliarineqarnissaat pingaarutilerujussuummata.

Oqaluttuarisaanitsinni kapitali taannarpiaq itisilerneqartariaqarpoq.

Qanoruna pisoqarsimasoq?

Qanorlu ingerlariaqqissaagut?

-o-

Inuunerup naleqassusia maannakkut eqqaaqqilaarusuppara – taannaammammi
ulluinnarni
pingaarnerpaanut ilaasoq.

Inuunerup ingerlanerani anorersuarsiortarpugut qatsunganersiortarlutalu.

Nukittortarpugut sanngiillisarlutalu.

Ilaanimi misigisarpugut ingerlariaqqissinnaajunnaarluta. Misigisarpugulli
aamma
ingerlarsorluarluta ingerlariaqqissinnaallutalu.

Piffimmi tassaniinnitsinni pisortanut ikiortissarsiorsiortariaqartarpugut.

Kommunit qitiulluinnarlutik
tassani inissisimapput.

Kommunimi atorfillit sinaakkusiunneqarsimasut atorlugit ikiuisarput.
Qularnanngitsumillu
sapinngisartik tamaat innuttaasunik ikiuisarput.

Ikiugassat ikiorneqartassapput. Tamattami pisariaqartinneqarpugut.

Qujanarlu suliffeqarfinni – pisortat pineqarpata imaluunniit namminersortut
pineqarpata –
aalajaallusi inuiaqatigiinni napatitseqataagassi.

-o-

Nunatsinni imminut toquttarneq unammilligassatta annerpaartaattut
taaneqarsinnaavoq.

Ukiummi tamaasa innuttaaqatigut arlallit iluatinnangaartut peeruttarput.
Tamanna
alianarluinnarpoq akuerineqarsinnaananilu.

Imminut toquttarneq pillugu unammilligassaq annertungaaraluartoq
neriuummik peqarpunga.

Inuusuttavummi unammilligassatta ingerlariaqqiffiginissaanut ukiarmi
ersarissumik
oqariartuuteqarput siunnersuuteqarlutillu.

Oqariartuutaat ersarissoq tassaavoq pisortat inuiaqatigiillu
allannguisariaqartugut.

Inuusuttut oqariartuutaat politikikkut tusaavagut aammalu
eqqumaffigeqqissaarlugit.

Inuuneq, tunissutit annersaat – inuusuttoqatit inuiaqatillu erligalugit
inuusuttatta takutitsinerat
qanoq nukittutiginerannik ersersitsivoq.

Inersimasuusugut tamanna tusaallugu aqutissiuussinissarput
pisussaaffigaarput.

Naalackersuisullu suliami pingaaruteqarluinnartumi inuusuttut qanimut
peqataatissavagut.

Ersarissumillu oqaatigisariaqarpara aatsaat inuiattut ataatsimoorluta -
tamattaalluta
suleqatigiilluta imminut toquttarneq akueriunnaarutsigu, ajornartorsiutip
annikillinissaanut
aqutissiuussinnaagatta.

Ataatsimoorluta mumisitsisariaqarpugut, annaasagut amerlavallaarujussuarput.

Inuit tamaasa pisariaqartippagut. Aamma illit eqqaamassavat –
pisariaqartikkatsigit.

Kisimiinngilatit oqaasinngortitseqatigisigut. Tapersersoqatigiitta
ataatsimoorangattami
nukissaqarlualersarpugut angusaqarluarsinnaalersarluta.

-o-

Inuuneq ingerlajuassaaq.

Nunatsinni innuttaasut 56.500-it missaanniipput.

Ukiuni aggersuni nunatsinni utoqqaat amerliartortussaapput inuiaqatigiinni
ukioqatigiiaat
inunngorsimanagerat tunngavigalugu.

Utoqqartagut qutsavigisariaqarpagut – taakkuuppummi uagutsinnut
isumaginninnikut.

Utoqqalinerlu tassaasariaqarpoq isumakuluuteqarani toqqissisimalluni
inuuneq.

Utoqqartagut pisariaqartippagut – taakkuuppummi ilinniarfigisassagut.

Utoqqartagut tapersersortariaqarpagut – taakkuuppummi inuunermik tunissuteqarnikut.

Utoqqartatsinnut atukkat pitsanngorsarniarlugit qinigaaffimmi uani aallartissimanerput ukioq manna nanginneqassaaq.

Utoqqarnullu periusissiassami ilaatigut utoqqaat pisariaqartitaat ersarissarneqarlunilu pitsanngorsaavigineqassaaq.

-o-

Nunatsinni pisuussutinik ulikkaarpugut atorluagassatsinnik.

Aalisarnej suli inuussutissarsiutta annerpaartarivaa.

Nuannaarutigeqaaralu aalisarnej ukiumi qaangiuttumi eqaatsumik unigani ingerlammat, atuisunit malugilluarnejartumik.

Tamanna aalisartunut, ilaqutariippassuarnut, kommuuninut aammalu nunatsinnut tamarmut iluaqutaavoq.

Tamatumani sila kisimi annerusumik killilersuisuulluni.

Sinerissalli qanittuani aalisartut tamarmik nunatta immikkoortuini pitsanngorsaaffiginissaa qulakkeerneqassappat kattuffiit qanimut akuutillugu suleqatigilluarnissaallu pingaaruteqarluinnarpoq.

Ataqqinartut piniartut aammalu aalisartut nunami maani peqqarniissinnaasumi atugaqartitsinnaasartumi atugaat pitsanngortuartariaqarmata

Aalisartut aalisartuinnaangillat.

Aalisartut ilaqutariinni pilersuisuupput.

Aalisartut nunatsinni aningaasanik kaaviaartitsipput.

Aalisartut suliffeqarfinnik napatitsipput.

Sinerissap qanittuani aalisarnerup ineriartortinneqarnissaa kissaatigineqarpoq
taamatuttaarlu
avataasiorluni aalisarnerup tulluarsarneqarnissaa aamma kissaatigineqarluni.

Aalisarnermut inatsisip inaarsarneqarnissaa tullinnguuppoq
piareersarneqaleruttorlunilu.

Eqqaamassavarput inuussutissarsiutitta pingaarnersaat isumatusaartumik
aaqqissuusseqqivigissagatsigu.

Puigornagulu pisuussutit uumassusillit uumaatsullu inuiaat kalaallit
tamarmiullutik pigisarigaat.

-o-

Aappaagu Nuummi Ilulissanilu mittarfiit nutaat atorneqalissammata
ulapputtoqarpoq.

Qaqortup mittarfia 2025-mi piariissasoq naatsorsuutigineqarpoq.

Aatsaat taamak ukiumi qaangiuttumi angallattoqartigaaq, ukiunilu tulliuttuni
angallattut suli
amerlanerulernissaat naatsorsuutigisinnaavarput.

Nunatta ammarnernulernissaanut piareersaaqatigiittariaqarpugut.

Periarfissat nutaat takkussuutilerput.

Nunatsinnilu eqaannerusumik angalasinnaalissaagut.

Avammut tunisassiorsinnaaneq eqaannerulissaaq.

Takornarissat amerlanerit tikittalissapput nunatsinnilu innuttaasut aamma nunanut allanut toqqaannartumik angalasinnaalissapput.

Aningaasarsiorfissat nutaat periarfissiinerat innuttaasuniit inuussutissarsiortuniillu atorluarneqartariaqarput.

Ukiumi qaangiuttumi sila allaaneroqaaq.

Silarloqattaarnera annertoorujussuarmik angallannikkut ilungersunartorsiortitsisimavoq. Tamanna uagut qanoq iliorsinnaanngikkipput paasisinnaavarput.

Taamaattorli nunattali iluani angallannikkut ilaatigut teknikimik peqquteqartut naammagisimaanngilluinnarpagut. Innuttaasut kiffartuunneqarnissaminnik neriuuteqartut ataavartumik kinguaattoornermik eqqugaasarnerat iliuseqarfigineqarpoq ammalu 2023mi suli piumasaqaatinik ersarissunik malitseqartussaq kinguneqartussarlu ingerlanneqalissalluni, innuttaasut pitsaanerusermik angallannikkut kiffartuunneqarnissaat qulakkeerumallugu.

Mittarfiit nutaat nunatsinni ineriartortitseqataassapput.

Mittarfiit nutaat periarfissanik nutaanik ammaassissapput.

Mittarfiit nutaat suliffissanik nutaanik pilersitsissapput.

Aningaasarsiorfissallu nutaat ammaatissallugit.

-o-

Anigaasarsiornerput pitsaasoq inuussutissaqartuarnissatsinnut, ullumikkumiillu suli

atugarissaarnerulernissatsinnut toqqammavissaraarput.

Nukissiutinik ataavartunik, nukimmik minguitsumik nunatsinniinnaanngitoq nunanulli allanut tunisassiarisinnaasatsinnik pilersitsinitsigut

– Erngup nunatsinni naassaangiusattumik pigisatta atorluarneratigut

– Aatsitassat mingutsitserujussuanngitsut inerisaaffiginerisigut

– mittarfiit nutaat periarfissiinerisigut

– Aalisarnerup aqutsilluarfigineratigut inerisartuarneratigullu – Siunissami aningaasarsiornerput inerisassavarput.

Inuimmi atugaannik atugarissaarnissaanillu sinaakkusiissalluta suliuartariaqarpugut.

Qitiusumillu ingerlatsinitsinni sipaarfigisinnaasavuttaa qiviartariaqarpagut.

Allaffissornerup annertuup uagutsinnut inuiannguanut tulluurtumik aaqqissuuteqqinnissaa oqallisaajuartarpoq.

Ukiumi nutaami oqallisigiinnarunnaarlugu aaqqissuuteqqinnissaanut alloriarnerit siulliit siunnerfigaavut.

Allannguisariaqarpugut, ullumikkutummi ingerlaannarneq aqputissaanngilaq aaqqissuuseqqitariaqarpugullu, siunissami kinguaatta nunaminni namminneq aquummik tigusinissaannut toqqammavissiiinissatsinnut.

Ulluni ingerlalluarfitsinnittaaq siulivut assigalugit, ullunut eqqanaarsarfigisariaqakkatsinnut qularnaarinissaq aalluttuartaqarpaput.

Ukiussamut pilinertulli - ingerlalluartailluta ileqqaarneq siunissamut toqqissisimanartumik tunngaveqartuaqqulluta tunngaviguuartigu.

-o-

Aningaasarsionnitta ineriartornera siammasissumik nunatsinni tamanit malugineqarnissaa qulakkeeqqissartuagassaavoq.

Taamaammallu siunnerfiit arlallit nunarput tamakkerlugu ineriartuutaasussat alloriarfigisimalerpagut – Sineriammi tamarmi sanaartornerup siaarneratigut ukioq manna ukiunilu aggersuni malugineqartussanngorlugu.

Soorlu:

Qasigiannguani Aasiannilu erngup nukissiorfiliornikkut.

Tasiilami Nuummilu erngup nukissiorfiisa allilernerisigut.

Inuusuttunut inissiat sanaartorneqarlutik aallartipput aammalu ukiuni tullerni ingerlanneqassallutik.

Soorlu Qaanaami, Nuussuarmi, Upernavimmi, Uummannami, Qeqertarsuarmi, Qasigiannguani, Kangaatsiami, Kangaamiuni, Narsami, Nanortalimmi, Tasiilami Ittoqqortoormiunilu ukioq manna ukiunilu tullerni sanaartortoqalissalluni.

Illoqarfinnilu annerusuni aamma sanaartornikkut ingerlatsinerit kiisalu ilinniartut inissaat amerlanerulersinniarlugit pitsanngorsarniarlugillu annertuumik ingerlanneqarlutik.

Tassa sanaartorneq siammasissumik pilersinneqartussaq sinerissami sunniuteqarlualersussaq ingerlanneqalerpoq.

Sanaartornermilu utoqqarnut pisinnaanerusunut inissiat inoqarfinni aama minnerusuni pilersinnissaat kommuunit qanimut suleqatigalugit ingerlanneqartariaqarput aamma.

Alloriarnerit taakku neriulluarfigaagut, ukioq mannalunna tamakkerlugu ineriartuutaasussanik alloriarfiusinnaasut aamma suli nangittumik ingerlakkumaarlutigit.

-o-

Ruslandip Ukrainemut saassussinera nunarsuarmi nunani aningaasat naleerukkiartulerneranik kinguneqarpoq, tamanna aamma Kalaallit Nunaanni malugaarput.

Sorsunnerulli kinguneri uagutsinniit nunani qanimut suleqatigisartakkatsinni, soorlu Europami annertunerujussuarmik maluginerlunneqarpoq.

Nioqqutissammi akitsorput. Inuuniarneq ilungersunarsivoq.

Eqqarsaqatigiittariaqarpugut tulluussartariaqaratta pissutsinut nutaanut allangortissinnaangisatsinnut.

Kalaallit Nunaanni innuttaasut artukkerneqannginnissaat anguniartuagassaraarput.

Nunarsuarmi pisut qanimut malinnaaffigaavut.

Arlaatigullu qisuariartariaqassagutta iliuuseqartassaagut, taamaaliortartalereerpugullu.

Qaqagumulluunniit inuiattut illersortuartariaqarparputtaa inuiannut nunamullu ataqqinnigani iliuuseqarnerit.

Taamaammallu Ruslandimut nunarsuarmioqatigiit killilersuutaannut ilaavugut.

Uagummi kiffaanngissuseqarnissarput namminiussuseqarnittalu ataqqineqarlunilu akuerineqarnissaa sorsuutigisimavarput ukiorpassuarni.

Sorsunnerup kingunerisaanik pissutsit naatsorsoruminaatsut najummatsisimanarsinnaasullu atoratsigit, ataatsimoortariaqarnitta pingaassusaa naqissuseqqikkumavara.

Pissaaneqarniunnermi takusarput uagutsinnut sunniuteqarmat aammalu issittup annertusiartuinnartumik nunanit pissaanilissuarnit soqutigineqarlunilu sunniuteqarfigiumaneqaraluttuinnarnerani – Inuiattut ataatsimoornitsigut

angusaqarsinnaanerput aatsaat iluamik pisinnaavoq.

-o-

Silap pissusaata allanngoriartornerata kingunerisa ilaat ukiumi qaangiuttumi maluginngitsoorunanngilarput.

Inuppassuit aasarsiornerminni imaluunniit ukiussamut pilissallutik aasaq piniarnissaannut silap unerisimannginnera siallerajunneralu kalluartarsimavaat. Piniartortavut aalisartortavullu aamma sunnerneqaqattaarput.

Silallu taamatut unerisimannginnera aamma angallannermut annertuumik sunniuteqarpoq.

Naalackersuinikkut silap pissusaata allanngoriartorneranut iliuusissanik sulineq nunarsuarmioqatitsinnullu akiuniarnermut sunniuteqarniarluni ingerlatsineq nangissavarput.

Angallannikkuttaaq pissutsit silap pissusaanit sunnerneqartut imaluunniit angallannermi kiffartuussisussanit pitsanngorsarneqartussat qanimut malinnaaffigalugillu piumasaqaateqarfigisassavagut ukiumi nutaami.

-o-

Kalaallit Nunaanni innuttaasut. Ataatsimoorluta angusassanik ulikkaarpugut.

Ataatsimoorluta meerartagut inuusuttortagullu ajunnginnerpaamik siunissaqartitsigit.

Meerartagut tasiortigit.

Inuusuttut tusarnaartigit.

Inersimasut kaammattortigit.

Utoqqaat ilikkagaqarfigitigit.

-o-

Tamattami seqinitta ataani inuuvugut.

Tamatta ullorissat taakkuusut ataanni inuuvugut.

Tamatta immap ataatsip avatangersimavaatigut.

Tamattalu silaannaq ataaseq najuussorparput.

-o-

Kalaallit Nunaanni innuttaasut - Nunaqqatit.

Nunarsuarmilu innuttaaqatigut.

Ukiortaami pilluangaaritsi.

Kilde

naalakkersuisut.gl

Kildetype

Digitalt manuskript

Tags

Nytårstale

URI

<https://www.dansketaler.dk/tale/mute-b-egedes-nytarstale-2023>